

KERAJAAN PERUNTUK BANTUAN PRIHATIN HAMPIR RM1 JUTA UNTUK PENANAM KENAF – MOHD KHAIRUDDIN

JITRA, 15 Jun -- Kerajaan melalui Kementerian Perusahaan Perladangan dan Komoditi (KPPK) memperuntukkan bantuan Prihatin sebanyak RM968,680 khusus untuk penanam kenaf di seluruh negara yang terkesan akibat pandemik COVID-19.

Menteri Perusahaan Perladangan dan Komoditi, Datuk Dr Mohd Khairuddin Aman Razali berkata jumlah itu melibatkan 1,357 penanam dengan keluasan tanaman lebih 1,937 hektar.

"Peruntukan yang disalurkan melalui Lembaga Kenaf dan Tembakau Negara (LKTN) ini diberikan dalam bentuk input pertanian pada kadar RM500 bagi setiap hektar tanaman," katanya dalam kenyataan sempena lawatan ke LKTN Kedah di sini, hari ini.

Mohd Khairuddin berkata sebanyak RM47,950 diperuntukkan kepada 54 penanam kenaf Kedah yang mengusahakan kawasan seluas 95.5 hektar di negeri ini.

Dalam lawatan hari ini, beliau turut diberi taklimat mengenai operasi Pusat Pemprosesan Biji Benih Kenaf serta demonstrasi pemprosesan biji benih kenaf.

Sementara itu, beliau berkata seramai 20 pekebun kecil terpilih di negeri ini menerima Insentif Pengeluaran Getah (IPG) berjumlah hampir RM6,000 hari ini.

"Ia adalah insentif yang disediakan oleh kerajaan bertujuan untuk menangani impak kejatuhan harga getah ke atas pendapatan pekebun kecil," katanya.

Mulai Januari 2019, IPG akan diaktifkan jika harga purata bulanan Harga Rujukan Getah Fizikal SMR 20 berada di paras RM6.10 sekilogram atau harga di peringkat ladang berada di paras RM2.50 sekilogram ke bawah.

Menurutnya, tuntutan IPG di Kedah sehingga 30 April lepas melibatkan sebanyak 35,284 pekebun kecil membabitkan sejumlah RM6.5 juta.

-- BERNAMA